

Gavman givim moa mani long daunim AIDS

.....Tasol pipel mas helpim

Andrew Molen i raitim

GAVMAN i putim han bilong em i go an-tap long givim moa helpim long pait egensim HIV/AIDS we i wok long kaikaim ikonomi bilong kantri na singaut i go long ol manmeri long helpim.

Dispela i lukim em i apim mani bilong Nesenel AIDS Kaunsil long baset i go long 4.1 milien Kina long strongim wok bilong en.

Bikpela tingting bilong en em long stopim dispela sik long i go bikpela na tu lukluk long ol lain husat i gat sik pinis na i no long rabisim ol.

"Bikpela samting yumi ken askim yumi yet em, 'Bai yumi mekim wanem tru long stopim dispela sik long i go bikpela long Papua Niugini?'" Gavena Jenerel Gren Sief Sir Paulias Matane i tok long pasim bilong Nesenel HIV/AIDS Samit long Pot Mosbi tude.

Long wanpela bung bilong em wantaim ol lain bilong Yunaited Nesen (UN) em i givim ol dispela askim na ol i toktok long kamapim ol samting we i wok long ol narapela kantri olsem Thailand, Uganda na long ol Karibien ailan kantri husat ol i bungim wankain hevi olsem PNG.

"Yumi gat bikpela hevi i stap nau we bai nap long bagarapim ol yangpela manmeri bilong PNG long bihain taim," Sir Paulias i tok.

Em i tok dispela samit o bung i kamap long gutpela taim we bai skulim ol manmeri long

save gut moa long wok wantaim dispela hevi na traим painim ol rot long helpim na daunim.

"Yumi noken mekim ol samting bilong yumi na lus tinting olsem dispela hevi no stap.

"Yumi mas askim yumi yet, bilong wanem na i nogat wanpela gutpela samting i kamap long dispela pait bilong yumi long olgeta yia i kam," Gavena jenerel i tok.

Em i tok: "Yumi mas wokhat moa, lainim long we yumi asua, stretim na painim ol narapela gutpela rot."

Sir Paulias i dispela pait egensim AIDS i mas i go aut long olgeta provins na ol distrik long kantri na olgeta manmeri long komyuniti mas wok wantaim long dispela.

"Mi sore tu long tok olsem taim i wok long sot," Sir Paulias i tok.

Praim Minista, Gren Sif Sir Michael Somare i tok taim em i opim dispela samit long Pot Mosbi long Tunde olsem i gat wanpela we tasol long mekim ol manmeri sanap strong na pait egensim dispela sik.

"Yumi mas stretim na strongim tinting bilong yumi na senisim pasin bilong yumi long dispela sik.

"Olgeta tingting nogut long HIV/AIDS na long ol lain i gat dispela sik i mas pinis na yumi mas bungim ol samting bilong yumi (risos) na pait egensim AIDS wantaim strongpela tingting," Sir Michael i tok.

Em i tok long dispela pait, gavman bilong PNG bai no i nap sanap na lukluk tasol.

"Em i mas putim han na kamapim ol samting we bai givim strong long ol manmeri i ken wok," Praim Minista i tok.

Sir Michael i tok hia long PNG, wok bilong stopim AIDS i go bikpela bipo long em i kamap em i bikpela samting ol i lukluk long en.

"Mi gat bilip olsem wanem samting yupela i toktok long en long las tupela de i go pinis i ken kamapim sampela gutpela tingting we yupela i nap wok long en na kamapim ol gutpela wok we bai nap helpim kantri," Sir Michael i tok.

Hai komisina bilong Gret Briten, David Gordon-Macleod i tok long "Talk Back" sho long FM100 aste tu olsem em i lukim planti tenis i kamap long liklik taim em i stap long PNG long dispela pait egensim AIDS.

"Mi lukim planti moa pasin bilong meri silip wantaim man i kamap na dispela i ken mi tingting olsem ol samting yumi save toktok long en long stopim AIDS i save wok o nogat," Mista Gordon Macleod i tok.

Em i tok ol wok bilong AIDS i mas i go aut long olgeta provins na em i no wok bilong wanpela ogenaisesen tasol husat i gat moni long mekim.

"Sapos pasin bilong ol meri na man i silip wantaim i go bikpela orait wok bilong mekim awenes long HIV/AIDS tu i mas i go bikpela.

"Em i no long namba bilong mani yu putim tasol long wanem samting bai yu kisim long ol dispela wok," Mista Gordon-Macleod i tok.